

道光遵義府志

遵義府志卷二十

風俗

周官小行人適四方集禮俗爲一書政治之得失卽風俗所由美敝方志必詳此者固以備黃車之時詢而實守土者求治之要柄也遵義巴蜀舊壤民生其間至今尙柔弱褊陋精敏輕疾與班固常璩所言大致同而自改土以來流移來茲者皆齊秦楚粵諸邦人土著以長子孫因各從其方之舊相襍成俗而遺風未遠初亦有所染漬久之遂忘其自來各省之舊已多非美俗更沿土風益成惡陋而山川風氣生人

成性類多徑情任私不準以前憲不學子弟泰然安
行無或自稍覺其非者爲賢令守可亦晏然坐觀也
乎今就見聞略爲實錄五州縣大氏相同可不分載
易曰觀民設教小戴記曰修其教不易其俗是所期
於化民者

頗尙學業少威儀多怯懦

華陽國志

敦龐淳固以耕植爲業鮮相侵犯天資忠順悉慕華

風

國經

世轉爲華俗漸於禮男女多樸質人士悅詩書宦儒
戶與漢俗同惟邊夷則椎髻披氊以射獵伐山爲業

信巫鬼好詛盟婚姻以氊矢爲聘粧燕樂以歌舞爲
佳會凡賓客會聚酋長乃以漢服爲貴出入皆佩刀
弩自衛至與華人交易略無侵犯

宋遵義
軍圖經

自明萬厯庚子後土闢民聚俗易風移蠶桑殊少專
事耕農土愿而好學女貞而克勤及入

本朝士風尤盛人才間出土質而有文民樸而易治崇
尙氣節不恥貧賤勤耕織敦禮讓云

陳志

郡播而還人猶近古民多樸魯士尙謹醇曩經奇劫
巴渝族姓避亂茲土遂家焉漸染於鬻凌之習

郡邑風俗自漢迄明皆淪於夷及播平後又隣于水

西故一統志與輿圖所紀不曰慕華風則曰同漢俗
不知由明以後已近百年士盡詩書人沐禮義弦歌
揖讓之盛視一統輿圖之說大相懸絕並同上

冠婚喪祭不尚奢華人知向學深山窮谷猶聞弦誦
聲雖夜郎舊地當與中土同稱通志

正安樸實淳厚以耕耘爲生大略與漢俗同土人以
元宵爲年禮天神享歲飯尚未盡變故習正安舊志

桐梓境原屬播地隣綦南近中國之化家貧好學人
務耕織信巫鬼好詛盟喪葬用鼓樂婚姻輕財帛燕
會以禮崇慕華風桐梓舊志

綏陽敦龐淳固崇尚詩禮士多有守民敦儉樸夷俗

悉除

陳志

仁懷俗淳土瘠人性獷悍類分四種好戰鬥以劫殺爲事乃耕火種不善絲蠶疾鮮用醫惟事巫祝婚姻世締喪祭用樂

同上

按右所有夷俗皆舊志據時實紀以今視之如身在中天滿目卿雲溯洄獠狂氣象迴絕若概從芟汰反使問故俗者莫得源流故採錄於前詳條目見如左

婚禮壻家請媒氏求女氏第幾女爲第幾子配女氏

許諾擇吉日卽備聘具華勝釵鐲等豐薄視家有無
必有拜書書壻父母名氏無父母書主婚者至日媒
奉香燭酒脯並聘具往女氏定婚謂之插香女氏酬
壻物亦視家有無將定婚期壻家具庚書列男之生
年月日時于左媒持往女氏謂之請庚女氏書女之
生于右復壻家亦有定婚時卽并奉庚書者女氏復
如之乃諏婚期報女氏先期數日擇吉納幣衣飾稱
其家謂之過禮女卽以是日卜吉者筭之開面梳髻
謂之上頭亦有至迎婦時旋過禮者女必先日筭屈
期鼓吹花輿往迎婦女氏以姑姊或伯叔兄送之必

夫婦雙至送者婦扶女出交拜扶入房壻家擇福壽者視合卺亦必夫婦雙謂之結納畢啟賓筵明日見宗祖以次拜舅姑及三黨舅姑及夫之期親女皆有所奉亦視家有無三日入廚親滌濯謂之下廚從便則合卺後卽皆行之擇吉日壻率婦往拜外舅姑謝媒以酒脯亦有婚日壻獨往拜女家者謂之謝親壻家遠者或往成婚于女氏後與俱還女氏貧或不及待時嫁者送女往壻家養之曰小坐俟男女長而後婚焉

喪禮死而斂入棺擇吉葬惟士家多久殯以待卜地

者屬纊後士民皆招僧道置魂旛設靈位曰安靈訃於親友告奠期至日親友具香燭醴饌往曰弔香至親富者或羊豕楮器備曰上祭有力家剪白布與纏頭曰開孝至親兼衣以白衣作木主請貴者點之貧家則否點主以夕設三獻之奠歌蓼莪講喪禮讀嘏告利成是爲開奠明日卽奠期始死七日一奠爲燒七至七七畢中或親友來奠皆焚楮錢用僧道行事過是則百期周年有力家或作道場否焚楮而已三年中擇吉日請僧道誦經上章盛造明器薦死者焚始設靈位曰除靈道場大小視其家貧或七七中卽

除靈葬後孝子往送火烟三日上墳祀后土焚地別
曰復山開奠葬前葬後隨其便必三年中大小祥及
禫祭士家亦鮮行者

士民家必設香火位于中堂中大書天地君親師位
旁列孔子文昌關帝竈神各紙牌多至十餘位少則
通書一紙旁止二小行必承以板有神主卽置其上
富者至爲龕鏤飾種種兼世奉釋道像至三五羅列
板下位長生土地並朝夕焚香有禱祀必于此士家
或別建宗祠然百不一二李鳳翎曰非其鬼而祭之
諂也冬至祀天子圓丘夏至祀地于方澤天地非其

時不祭非其地不祭非其人亦不敢祭也孔子大聖
關公文昌明神列于家庭褻地可乎苗鬼牛神僧道
女尼雜于家龕俎豆之中于理非宜且祖宗之靈亦
有所不安也嗟乎時俗之蔽可以思矣卽以二教言
之好清靜惡紛煩者道教也今煙火堂中呱兒啼女
雞犬嘈雜確磨喧聞不幾濁穢道德乎不飲酒茹葷
者佛教也今不聞伊蒲一供惟用酒醴三牲彼西方
佛子南海白衣其肯爲我破戒乎可爲一笑

士民以正月十五七月十五爲大節陳祭饌焚包楮
祀其祖先元旦薦湯圓粉餅端午薦糉除夕薦年飯

惟士家祭祖父生忌日

士民正月元日夙興陳茶果焚香燭于堂衣冠拜天地祖先祝

皇帝萬歲卑幼各拜尊長始開門放爆竹向吉方行拜喜神謂之出行持香楮往寺觀拜佛道像各至本族家及祖墓賀歲謂拜年遠者及隣戚他日次第賀之城市多以小紅刺書某恭賀貼于門不必躬拜他日各招親友聚宴爲年酒鄉則必躬拜親友多者盡正月皆燕食也故俗稱爲酒肉開花時親友往來必有所攜歸必有所包市人擇吉開張書童擇吉上學必于

旬內初九日爲上九俗傳玉皇生日士民夙興設茶
果香燭致拜自十三日之夕家各于其祖墓前點燈
焚香楮盡十六日止雖遠必至雖貧必點一夕十四
日陳饌祀祖先焚楮包謂上元焚賻十五日晨焚楮
於門外諺云火燒門前紙各人尋生理自入日後燈
唱喧闐一國若狂盡二十日止中旬以後婦女始取
次往親族家諺云青草蓋牛蹄姑孃拜年時二月初
三日士民醵金祀文昌三月清明前後十日各剪白
紙標掛祖墓上芟穢增高或男女皆適墓陳饌祭之
餽餘而歸若歲氣暖農家以清明下種謂清明秧二

十八日郡中作東岳會最盛五月五日爲端陽節家以箬葉裹糯米爲糉飲雄黃酒菖蒲酒懸艾人蒲劍於門剪綵組爲五毒物及猴猴置小兒肩背以雄黃抹小兒面孔謂辟疫避蚊六月二十四日各醵錢祀川主宰牲歌舞或數日始罷七月十五日陳饌祀祖先焚包楮謂中元焚賻多於十三十四預行之八月十五日少年或摘瓜送艱嗣者飲燕以爲娛樂九月九日煮蜀糴爲呷酒謂重陽酒對年飲之味絕香老十二月二十四日夜陳養餚焚香楮祀司命爲送竈多於二十三日預行之除夕復然爲迎竈送竈以後

宰豚劬酒春粢粉磨米餅盛作歲食以供新年點茶
包餽換楹帖掃棟宇凡市日日聚謂趕花場三十日
陳饌祀祖先家人聚食謂食年飯卑幼拜尊長謂辭
年夜各不眠謂守歲每歲或正月或二月各釀錢建
道場祀瘟火蟲蝗之神曰平安清醮三月三日六月
六日九月九日各釀祀本境土地之神以爲祈報
邵俗遭喪未卽殯葬其戚里往往釀酒米脯菜夜會
喪家辦奠具卽以燕飲謂使其家不悽寂曰伴夜深
宵聞號呶之聲喪主極周旋之苦考峒溪纖志言苗
人親死則聚親族笑呼歌舞謂之鬧屍又曰唱齋是

半夜者舊著之遺惜人皆無知者

婚禮十無一親迎者古之禮人子有事無不受命子之娶也父命之授以鴈往至女家再拜奠之以明親受於父母父母不在則受命於主祐所謂布几筵告廟而來也故曰授室今既不親迎又不命子女之來壻與交拜花燭而合昏爲父母直若不知此事者是誠何禮也且更惑建除家言曰某日執翁姑則女入門時翁姑必遠走潛避須不聞鼓吹聲以避其殺可笑尤甚是不獨遵義然誠怪事也

負屈莫白力求自明其神前惡誓者曰賭呪其執雄

雞當屈之者門或神祠中伸其冤懇其報管斬其頸者曰砍雞其至寺觀中取藏經布地赤身袞其上呼冤求報者曰袞經其取神像供龕中或樹下朝暮焚香求報者曰憑神此惟憑神無大害彼家或適有死者曰獲報矣已有之則噤聲否亦遲久各休息惟砍雞袞經賭呪三者十九出於無良之徒曲實在已昧冒行之曰吾心明矣已偷竊必令彼洗盜名已欺奪必令彼授所負而直者轉爲所曲吞聲不能更言噫

世安容此澆惡也

並田居
蠶室錄

蠻獠有事急辨不明則對神祠熬油鼎謂理直者探

入鼎中其手無恙愚人不勝憤激信以爲然往往焦
潰其膚莫能白其意者此習土著之民亦皆從之少
抱微寃動以撈油爲說

峒溪
織志

歌舞祀三聖曰陽戲三聖川主土主藥王也近或增
文昌曰四聖每災病力能禱者則書願帖祝於神許
酬陽戲既許後驗否必酬之或數月或數年預潔羊
豕酒擇吉招巫優卽於家歌舞娛神獻生獻熟必誠
必謹餘皆詆諧調弄觀者哄堂至勾願送神而畢卽
以祭物燕樂親友時以夜爲常李鳳翽曰按三聖者
藥王大抵如岐黃俞跗之屬至土主黑神二公生爲

人傑死爲明神其正氣常留於天地之間竭精誠以祀之猶懼不欲況以巫氏之戲侮將之耶夫不以人之祀而福之亦不以人之不祀而禍之所謂正直之爲神也苟以疾病災苦之故於鄉曲間受媒嫚之祭鄉黨自好者不爲謂二公爲之乎土主有順應廟黑神有忠烈廟漢唐以來歷代優崇守土者春秋蒸享不絕此禦災捍患有功於國者所爲食報千秋也世俗之愚不考所自來不足責而明理之士亦惑於巫氏邀福瀆神不思之甚也

蜀語男巫曰端公仁懷志凡人有疾病多不信醫藥

屬巫詛焉謂之跳端公田居蠶室錄按端公見元興
章則其稱古矣今民間或疾或祟卽招巫祈塞驅逐
之曰禳儺其儺必以夜至冬爲盛蓋先時因事許願
故報塞多在歲晚諺曰三黃九水臘端公黃黃牯水
水牛皆言其喜走時也其術名師娘教所奉之神製
二鬼頭一赤面長鬚曰師爺一女面曰師娘謂是伏
羲女媧臨事各以一竹承其頸竹上下兩篋圈衣以
衣倚於案左右下承以大碗其右設一小案上供神
曰五猖亦有小像巫黨椎鑼擊鼓於此巫或男裝或
女裝男者衣紅裙戴觀音七佛冠以次登壇歌舞右

執事曰神帶左執牛角或吹或歌或舞抑揚拜跪以
神曼聲徐引若戀若慕電旋風轉裙口舒圓散燒
紙錢盤而灰去聽神絃者蓋如堵牆也至夜深大巫
舞袖揮訣小巫戴鬼面隨扮土地神者導引受令而
入受令而出曰放五猖大巫乃踏闕吹角作鬼嘯側
聽之謂時必有應者不應仍吹而嘯時擲筭筭得謂
捉得生魂也時陰氣撲人香寒燭瘦角聲所及之處
其小兒每不令睡恐其夢中應也主家亦然間有小
兒坐立間無故如應人者父母不覺常致奄奄而斃
先必斬茅作人衣禱者衣履至是歌侑以酒肉載以

茅舟出門焚之曰勸茅送茅謂使替災難也事畢其神像於案前令虛立椀中歌以送之仆則謂神去女像每後仆謂其教率娘主之故迎送獨難云考峒溪纖志言苗人臘祭曰報草祭用巫設女媧伏羲位則此乃相沿苗風也今士夫家亦行之沅湘以南尚巫鬼自古而然固不足怪特其捉生魂替代大與漢人之埋魂放蠱同干法紀聞昔數十年大巫多有傳授迎者極恭敬禮謝亦豐今其教衰且賤業者餬口而已地方官若禁其泰甚必今日教下明日卽不爲亦古人因其教不易其俗齊其政不易其宜之意也

胡端禁端公論黔蜀之地風教之至惡者莫如端公
不悉禁必爲大害吾嘗觀其歌舞跳躍盤旋苗步也
曼聲優亞苗音也所稱神號苗祖也是蓋苗教耳而
人競神之何哉或以謂此巫教巫教雖古聖人亦不
禁且楚巫之盛自周秦來非一代矣何傷乎嗟乎以
吾道論卽楚巫亦不可尙何況苗教而人之神之者
浹肌膚淪骨髓今日卽訾以媚苗渠亦不自愧也可
哀也哉彼苗之言曰吾有疾勿藥神能療之吾有仇
欲報祖能殺之且吾蠱食以召人殺牛以祭神得失
吉凶吾師皆能先知之於是羣躍曹歌以靈其神且

以其術惑漢人而爲端公者亦不自知爲苗所惑遂羣起效之以爲衣食技而又引古之巫以自尊決禍福假於神以誑煽婦女小民無知亦信其家人婦女之言遂燒香許願敬其神畏其鬼爭迎端公至家歌舞以禱焉其狡焉者又或結連匪黨迎端公於深山大箐之中殺雞醺血指神稱誓以爲生死弟兄互相劫掠於山澤間往往爲鄉民害吁端公之教惡至此延蔓不治吾恐多事之秋巨奸大猾假其鬼名以號召亡命則張魯孫恩之徒未必不非其人也故曰不

悉禁必爲大害

端乾隆末貢生

蜀語壇神名主壇羅公黑面手持斧吹角設像於室西北隅去地尺許歲暮則割牲延巫歌舞賽之考炎徼紀聞曰羅羅本盧鹿而訛爲羅羅有二種居水西十二營寧谷馬場槽溪者爲黑羅羅曰烏蠻居慕役者爲白羅羅曰白蠻俗尙鬼故曰羅鬼今市井及田舍祀之縉紳家否杜子美詩曰家家養烏鬼卽此也養讀去聲注杜詩者以烏鬼爲鷓鴣或云猪皆非按奉壇神者其神以徑尺之石高七八寸置於堂右倚壁曰壇等上供壇牌粘於壁旁列壇鎗其牌或書羅公仙師或書鎮一元壇趙侯元帥郭氏領兵三郎兩

旁列稱號數十名皆不可究詰每歲一祭殺豕一
巫跳舞歌唱徹夜謂之慶壇畢張白紙十二巫自執
其額瀝血點之粘壇側謂應十二月之數或曰世奉
此可致富稍忽致家道不昌李鳳翽曰家堂非可設
壇壇亦非可祭於家或謂古蠻祭也或謂趙侯郭氏
蓋古開邊名將有功茲地者如此是亦明神也何自
來並無傳聞耶又何僅祀民家而處褻侮之地耶余
觀其牌所列並謬妄不經必古之巫者譎造以惑村
愚耳余叔購一宅其堂舊有此神叔負之擲陵谷置
究無他事信則有否則無何俗人之不悟也

土地鄉神也村巷處處奉之或石室或木房有不塑像者以木板長尺許寬二寸題其主曰某土地塑像者其鬚髮皓然曰土地公粧髻者曰土地婆祀之祭燭穀酒或雄雞一俗言土地靈則虎豹不入境又言鄉村之老生而公直者死爲之按土地不一有花園土地亦爲災於小兒祀之花園者也有青苗土地農人所祀有長生土地家堂所祀又有欄垵土地廟神土地等皆隨地得名青苗土地主農事者也山農以七八月平地農祀以四五月以白紙錢供於田間謂之田工老此蓋八蜡司嗇之神時俗祀之云

義者也長生土地卽五祀中雷之神俗祀之家
別置一龕題其主曰后宮瑞慶夫人以中雷爲夫

其說謬誕不經士家亦供此牌尤可笑

覺軒雜著

龍江老訟神也訟者祀之豚一隻祭畢析豚左肩視
之有紅紋者吉黑者凶以此驗勝負李鳳翽曰此兩
造所必祀之神原告者必敬必誠跪而祝之曰得勝
被告者亦祝曰得勝天下理惟一是勢無兩勝神其
以祭之豐嗇爲勝負耶將執理之曲直耶抑東倒羊
頭西倒猪頭爲齊女兩袒耶神亦難自平反也嗚呼
俗人之愚可以悟矣聞賊盜亦祀龍江不用火燭以

酒脯黑地奠獻其綠林之黨萑苻之魁歟是不可知也

上同

四官爺財神也俗稱西溪洞中求財打寶四員官將鄉市間家供此牌祀之錢馬香燭酒一瓶列四杯肉一方謂之刀頭置刀樵上旁盛鹽椒水降神奠獻畢各執杯酬飲切肉點鹽柑食李鳳翽曰西溪五溪之一神蓋祠人也上同按正安舊志有三撫老穆相公祠云太原楊端居播有善政播人立祠祀之稱為三撫老穆相公附以嚴唐羅冉為四官財神至今徧祀俗遇疾輒許泰山預備祭品至冬宰豚醢酒招巫

願謂之還泰山李鳳翥曰泰山鎮東方視三公國君之祭也季氏以命卿旅猶無益巖巖之靈爽反居歆民庶耶鄉愚不足論詩禮之士亦貿爲隨俗其亦聞孔子嗚呼之歎乎

覽軒雜著

俗以茅葉卜吉凶謂之茅草卦

傷鬼路鬼也中之頭痛身熱或沉迷不省人事始以茅葉一挽標埽周身隨以紙包茅置香龕謂之願標招善禳者造花盆置標於中香燭酒脯夜送至三叉路頭祭畢傾祭物於地其盛器擲破之鬼箭鬼所操以射人者也人或中之不急救或死畜

產中之亦然治之以雄雞掃其身卽愈人則探其痛處以雞子環滾之剖視其黃有黑影有箭影以此爲驗

二分土地凡幼男女或腹痛嘔吐必禱之日暮以香三炷飯二盂每盂置雞子一枚二人送菜園中祀之畢二人食不畱餘歸李鳳翽曰不用紙燭酒穀此鬼之不貪者也或曰童孩病皆二分作祟或曰其痛號也禱二分而愈如前說致害甚大獲利甚微其罪重矣二分當押送大巫門下如後說惠以及人廉於處已其功爲鉅可置之小兒科中

罐落神者以木飯匙紙糊之畫頭面束於簪梁縛扎
如人形以小兒衣衣之幼女二人夜靜時於黑地以
炷香繞其面祝之數四卽搖動而來落重如石執者
不可易手易卽去二人平執奉座中觴拜問事拱立
俟之所問以揖爲徵如問晴則揖雨則否或戲之及
煩數卽頓立不動又有泥姑神以泥丸請扁担神以
扁担請扁担神其靈更異皆村曲小兒女正月中所
爲

新年開燈時切茅二莖曲其兩頭上如鉤下如人腳
掌以小木枝長五六寸許對插立橫架一木枝以懸

茅莖用雞羽拂椽葉掠茅足祝之曰正月正特請茅
孃來看燈無娘單足來有娘雙足登其兩足如所祝
舉蹈不爽枝柱爲動謂之請茅孃並覺軒雜著田居蠶室
錄異苑世人以正月十五日迎紫姑捉者覺重便是
神來奠設酒果亦覺貌輝輝有色卽跳躁不佳能占
眾事卜將來蠶桑又善射鉤好卽大舞惡則仰眠平
昌孟氏恆不信躬試往捉便自躍穿頂永失所在據
所言捉者必是所憑之物其法無明文今罐落神當
卽迎紫姑之遺傳者失其名義以憑落卽落呼之但
稱罐又無取考洞覽云帝嚳女將死云生平好樂至

正月可以見迎則罐落或慣樂之訛也

上元時鄉人以扮燈爲樂用姣童作時世裝隨月
家雙雙踏歌和以音樂艷以燈火抑揚俯仰極態
妍謂之鬧元宵其中所唱十二月採茶歌如三月
茶茶葉青茶樹腳下等鶯鶯二月採茶茶花開借
情儂幾時來音詞清婉莫詳所自考吳震方嶺南
記云潮州燈節各坊市唱採茶歌尤妙有曰二月
茶茶發芽姊妹雙雙去採茶大姊採多妹採少不論
多少早還家三月採茶是清明孃在房中繡手巾兩
頭繡出茶花朶中間繡出採茶人有前溪子夜之遺

是知天籟自然矢口成妙不可以操土風少之也

錄登室

蜀都賦都人士女絃服靚妝茲處蜀之最南去卓鄩之風甚遠士夫家間或藻飾其餘白布裹頭不以爲

諱也

仁懷志

宋史載大小播州以威勢脅誘漢戶有不從者屠之沒入田土往往投充客戶謂之納身今征勦之後皆散處多有納身於漢戶者是昔時苗人役漢人今則漢人役苗人矣然今之姓本主之姓誠亂宗之太者漢高祖賜婁敬姓劉先輩猶非之况苗人乎

俗用祝由科古法也吳人葉天士紺雲園古方選
用此惟黔楚祝由科更效凡金石湯火手足傷至流
血者用焉愈矣謂之收水仁懷志按說文禱祝福也段
玉裁注惠氏士奇曰素問黃帝曰古之治病可祝由
而已祝由卽祝福也已止也

華陽國志謂喜佩刀劍斯固剛勁之風也至安楊雄
據愈益尙武以千里之地爲兵者三萬人雖牛犢乎
刀劍之矣近約文教此風已戢然尙有以竹弩守門
以畚刀自衛者仁懷志

石敢當蜀語見漢黃門令史游急就篇衛有石碣石

買石惡鄭有石癸石制周有石速齊有石之紛如皆有勢位所當無敵今宅有衝射處卽位此石蓋取此義以禦煞星耳故凡人有擔當者亦目之曰石敢當庾信小園賦鎮宅神以薶石倪璠注淮南畢萬術曰埋石四隅家無鬼急就篇曰石敢當顏師古注敢當言所當無敵也今俗居當街道猶埋石書石敢當其遺意也今按人家少埋石者多於門中直釘一虎頭扁中書泰山石敢當

入市交易曰趕場三六九爲期辰集午散猶河北之謂集嶺南之謂墟中原之謂務綱按各場聚市期有

一六者有二七者有三八四九者要以五日一次又有期鼠馬者期牛羊者各以其日支所屬爲市

犇陽國志蜀志在辰爲未故好滋味德在少昊故好辛香蜀語飲食曰滋味注益州地在十二辰爲未未者味也萬物皆成有滋味也故其人好滋味按郡城內外肴饌之館不下三十家勺藥和具日無虛席居人頓頓之食每物必著番椒貧者食無他蔬一碟番椒呼呼而飽則其好味好辛蓋由方氣然也

犇陽國志蜀志有蜀侯蠶叢其目縱始稱王死作石棺石槨國人從之故俗以石棺槨爲縱目人家按郡

通志卷之二
俗至今猶尙石槨古風世傳不能以通禮禁之也前
代造者高原坡陀鋤壑雨洗十九露出無山無之往
往方丈之地有多至數十槨者

董勛問禮俗正月一日爲雞二日爲狗三日爲猪四

日爲羊五日爲牛六日爲馬七日爲人八日爲穀

初學

記按今俗又謂九日爲鬼十日爲賊云此二日宜晴

霽不宜陰雨陰雨則民多疫癘盜賊盛行

乾隆十一年縣令朱超玟串同書役秋征等子每兩
大四五錢遵義納糧之弊始此差役到鄉鮮衣怒馬
戶婚田土案件必賄至十餘金命盜案必索至百十

餘金以上遵義差役之橫始此三十五年縣令江瑁

立管里差差之擅霸始此

遵義紀聞

道光十六年貴州巡

撫賀長齡札飭遵義五屬爲查禁事照得黔省差役之害前已數次飭禁而弊端紛出防範宣嚴不得不再申告誡風聞各屬簽差三四人下鄉勾攝公事拘提犯証該差輒帶白役三二十人出城後騎馬乘轎沿途騷擾行抵鄉間需索酒食銀錢鄉民畏之如虎惟命是從在有力者尚可出貲以應無方者不免典當房屋設措付給甚至賣男鬻女冤苦無伸而奸蠹谿壑難盈更拿至僻處恣意凌虐非刑拷打有鴟子

浮水老狗向火猴子扳椿臥馬銜蹏等項名目該蠹並有奸巧之法使其傷筋而不傷皮骨雖受者痛不欲生而外面並無形跡可見官見其並無私拷傷痕遂不復疑卽該犯亦不能自白其苦況衙蠹如虎該犯並不敢白乎迨到案後衙蠹教令妄供或誣扳平民以爲株連索詐地步種種不法深堪痛恨除札道外合亟札飭札到該司卽通飭各屬遵炤凡遇票差衙役下鄉務須正身前往尅期繳票銷差不准雇替私帶白役亦不許騎馬乘轎並嚴禁需索滋擾私自拷打等弊平日務嚴加約束查有素不安靜之役立

卽草出况白役本干例禁額設之外不准多添一
並將不准差役騎馬乘轎隨帶多人下鄉各情卽
張告示使民共見其聞如有差役提案令該處約
及原被人等查驗票內官差名數查點來役多寡凡
遇票內名數不符或票內無名者卽係白役私自隨
帶之人准其隨案具稟其或藉票索詐亦令被詐之
人隨時扭稟更於聽訟之時每案必盤詰原被人等
有無被差私拷訛索之事如訊有私拷訛索情弊立
卽究明賍數多寡從嚴懲辦

俗語見人物之可誇者曰嗚呼可鄙者曰噫嘻

老學庵筆

記平原曰壩黃山谷詩注酒器曰壩言語忤人曰觸音人

燒礦爲鐵曰煨音善火炙曰煨音考又曰煨音脅鼻塞曰壅

祝音祝謂看曰省音鎖平曰瞶音苗曰瞧魚網曰翼音漩飲食

變味曰餽音搜臭皮裂曰皴音村腹瀉曰過土高起曰埧

聲倫上曲木可挂物曰鉗鉤俗作鈎鉢木器曰鉗音奔鋤切

草刀曰劊音札刀平木器曰鉋音報子詫其多曰夥音窩夥

以刀磨瓦盆或皮上曰鑿音避目不見物曰瞽音務露牙

曰齟音報以辛香和食曰蕃音向香圓稻米曰秣音晚米女

工曰鍼音鍼犁上鐵板曰鉗耳老曰老革革木段曰橦

同音同下垂曰躄音妥結堅曰凝音禁和物曰拚音盆物朽而斷

曰割尊上人快敏曰劖利水岐曰汧音橫木阻之

擋穿牛鼻繩曰牽音春槌成熟曰臠音剡母之父母曰

外公外婆磨之漸消曰銛俗音穀穗曰秬音割牛

勢曰駟音不精彩曰驪音馬音塔音臘皮冒鼓曰鞞音謂多

曰夠音耳垂曰聒音足踏曰躡音上牛馬腰左右虛

肉曰軟廉音物濕而黑腐曰勃一曰黴音乍晴乍雨

曰湏音淞音雨沃土曰魚米之地日中曰晌音午劈

破曰斯聲破曰嘶馬鳴曰嘶器破曰甃餽餽曰扁食

以米糲鹽椒釀肉魚曰鮓手承物曰拓推人曰攘音

手提曰捷音摘毛曰擎音跛行曰踏音心動曰慙音

麪散者曰麪音勃鞍薦曰厯音替抽厯曰厯短衣曰襦音莊

不與人分辨曰不理寒熱結痃曰疥音幸瘍子耳中作

聲曰聒音翁謂子曰憲音宰凡高出曰矗音鏡凡苗實聚多

曰纂纂通水槽曰筧音簡竹筏曰篲音迷條有耳瓶曰甗

音作涼席竹曰筴音水竹木石牡曰龔音筍以鹽漬物曰

濫音覽箸曰箴音快伸麪曰擗音敢謂人形短曰矮矦矦音搓

鞋襯曰幫門地脚曰限音坎物小曰穉音雌物臭曰臙音滂

醜音抽去牝馬曰驊音雌狗曰草雌思雄曰起草宛轉生

動曰蚘音牛去疥瘡曰乾癩音土傷痕曰痛癩音論

赤子陰曰峻音構地平曠曰盭音覽地芝曰菌音附赤

礱曰礱內音物相擊聲曰砢音碎音蹠音驛遞曰站重聚曰

磊音嶺音上人之狡黠者曰尖音鑽音鑽音尾曰已音巴艾炷

曰燂音火爆曰炆音旁屋曰厦手掬曰杯音手挽曰

撻音粗率曰体音散物曰揅音斂衣裳曰扱音

驚畏曰嚇音手裂物曰搥音盛酒器謂之酒落

盛茶器謂之茶落凡驢騾所負物曰他音子大甕謂

之甗音得利曰賄音蟲螫人曰蠶音以毒藥藥人

曰癆音笑曰啞音鞋無飾曰鞞音牛羊食已復吐

而嚼音之曰回嚼音收摺之曰摺音撲爪刺曰搯音曲

謂之蛎貫縷提之以織曰綜音橫縷曰緯音直縷曰

經音經痴音痴愚曰夢音夢憊音憊壓物曰攀音攀性傲曰鯨音鯨剛去不

平曰翫音翫桃李核曰覈音覈忽吸之曰敕音敕箸去汁曰滷

必指物事曰者音者面瘡曰炮音炮飯粒粘紙曰飯黏

年音年碾物使光曰研音研柄曰杷音杷子細謂之把穩凡去

瓜果皮曰雪藏酒曰窖音窖印倭音倭足曰跽音跽茄酒醋中小

蟲曰蠓音蠓言吃曰蹇足皮曰趺去垢曰礅音礅刮鍋曰

鏟平木器曰鏟削平曰鏟音鏟履中模範曰檀音檀絢起曰

張衣系曰襻音襻甑底箴笄曰筭音筭飾邊曰緣音緣攪曰

槽音槽眼皮動曰眨音眨暗眼鹽鹵曰膽水田舍曰莊主

父曰使音使長公主母曰使長婆熬曰煎音煎雞伏卵曰

拖抱音汙穢曰浣餓音置釘平聲曰釘音椿樹曰穀音馬障

泥曰礪音毛席曰毯足蹂曰跣此平聲豕項間肉曰臙

曹音頭負物曰馱一曰背悲音撻穀器曰連音束小兒

者曰縑音馬後革曰鞅騾後木曰紂棍瓦器未成曰

坏披音拾物曰褰音呼狗吠物曰嗾音線條曰絳音釜

溫曰鷄音表畫曰寢音吐氣曰吹火平聲叱之曰嚙音

不速曰遲音遲音睡人曰啡二音聲不清圓曰嘎音

沙上聲快走曰姦音蠹蟲曰蛆音木岐曰𨮒又上聲縫皮

曰鞫音師之曰啐音村市曰場呼人曰嘒音胃喉曰嚙

一曰嚙音夏曰暴雨曰偏凍雨飲聲曰𨮒音漉物曰𨮒

妖上聲

抄飯匙曰秉音進船曰划音華音盂水器曰戽斗手

卜曰拈鬮音小曰蔑蔑曰丁丁又曰點點又曰些些

騰聲曰欵音瀉器曰筭箕關捩曰捎音簋音凡物已

採復搜其遺曰散賀人曰恭諗音審音毀人曰誹音詞不

屈曰響音絳音以言阻人曰讎沉水曰沒音迷音去音曰淹音庵鋪

塾曰擗音霸音縷在紡車上及在梭中曰總音遂音正屋曰袋

音薦俗作犖音壯牛曰牯牯牛曰犛月半明曰朐朐亮繩索

斷而續之曰剡音燒刀刃納水中以堅之曰粹音以

篋束物曰籊音孤音竹器曰篋音審器光曰釉音瘦音

曰皴音苔手掘曰窆音切音蓋曰康音傷皮曰剝音

裂開曰笑碎切曰劊札音織具曰筴寇音渣汁曰澱細長

曰瞭挑音了謂人樸訥曰木訥黠音熱而皮生瘳曰痂

費音子多鬚曰鬚開音腮縮髮爲髻曰髻音鬢音麪漿曰糲絳音

樹枝岐者曰桎音閉門機曰橈音搦汁曰齋音以物

沾水曰蘸音大曰樊莊音上曰莽爛曰黻音跋音粗意曰怵

贛音莽不慧曰昏惆音疔曰懵懂音猛一目眇曰單

照牙垢曰牙厘暗屋上承椽梁曰檁音小兒學行狀

曰跽音水上涌曰湄音擊曰搭音手采曰將小兒手

據地行曰趺音屈膝曰蹠音上日費曰進用補漏曰

苴音不脆曰孺音不鮮曰蕩音不端正曰蕞音上音礎

鮮音人死曰過世謂人曰炆音焦聲曰齒齧音括查音括齒

畏曰齒音推之曰摠音漩水曰漩音渦手捉曰搭音客水

潭曰沱沱音壅物味變曰邕邕音甕醜醜音鬼去築隄蓄水曰迮

音熟米麥末之曰炒麪深巖曰嵌音謙謂欺給曰鬼謂

人黠曰鬼生卵曰生去聲謂人村曰山巴士獠不伸曰

拘紐音舟著地曰苛聲去繞腰窄囊曰纏聲去袋分麻曰

亦音跛音行曰音𨔵音取笑語曰訛音山頂霧曰山帶帽

物墮水聲曰澠石墮曰砢俱音漉去水曰漉齧骨曰

齒音豬脂中堅者曰脰移音電曰睽閃音肥脂曰驢

指文曰膈羅音精肉曰膻精音胎衣曰臍胞音溺溺音掌掌音三

分段曰稜魯切禾不實曰穰音遠曰寫音暗誇曰音

行不進曰趑音介危音甘小兒女曰么不知名音

儒漬藏肉菜曰醃淹音酒器曰酒醢音海不去滓酒曰

勞糟鹵水曰醖減音勉力曰弼音絳自謂曰我謂人曰你

每耳曰睡柔平聲乾肉及餅曰巴不謹曰惕音搭開

張曰侈音潤口曰多車上聲牛羊馬豕欄曰圈禽卵曰

彈薰藥曰熏訓音火燒曰煨香氣盛曰馥蓬去聲兩手相

摩切曰按音磴罵人之醜稱曰雜種重曰重音典典反本

弓戾曰弣音別凡器物指甲裂皆曰矰與小兒戲捉其

鼻曰牽牛狡獪曰姁胡刮反稻苗秀出曰放標音急遽

曰奔去聲命發饅頭曰起醉教音便旋曰出恭有所礙曰

隱思上聲凡戲玩曰耍澆花木菜蔬曰飲去聲水凡初贈

工匠曰利市蟲食菜曰蟲殺去聲物件曰家火氣鬱不

伸曰漚去聲犬羊癩曰廬四邊曰四映人之憤憤者謂

之齏濁音解褥子謂之裯音調子凡顏色鮮明曰翠言

語不合謂之不對牡老不聾聵疾不沈重皆謂之新

鮮煖酒曰湯音蕩襯裡曰胎鑄音注銅鐵器曰鑄音到心亂

曰恹恹音老慚恥曰穀音慨羞聚足曰躡音攢低聲曰啾

啾反小腸曰孥音子腸玉讀若遇石讀爲旦孟讀作

夢大讀一鷲以朋音蓬術述音蜀巫誣音烏尹音允

虹音岡去聲署音樹衡音烜奚音希蜀道驛記謂小港曰港

按地方常言有其聲不得其文者多矣明李實留
意方言所撰蜀語事徵本原十得七八今悉採載
其有他處之語遵義獨無者不錄

苗蠻明

南平獠東距智州南屬渝州西接南州北涪州戶四
千餘多瘴癘山有毒草沙虱蝮蛇人樓居梯而上名
爲干欄婦人橫布二幅穿中貫其首號曰通裙美髮
髻垂於後竹筒三寸斜穿其耳貴者飾以珠璫俗女

多男少婦人任役婚法女先以貨求男貧者無以嫁
則賣爲婢男子左衽露髮徒跣其王姓朱氏號劍荔
王貞觀三年遣使內款其地隸渝州唐

西南諸夷漢牂牁郡地武帝元鼎六年定西南夷置
牂牁郡唐置費珍莊琰播郎牂牁夷等州其地北
距兗州百五十里東距辰州二千四百里南距交州
一千五百里西距昆明九百里無城郭散居村落土
熱多霖雨稻粟皆再熟無徭役將戰征乃屯聚刻木
爲契其法劫盜者償其主三倍殺人者出牛馬三十
頭與其家以贖死病疾無醫藥但擊銅鼓沙羅以祀

神風俗與謝蠻同

宋史

花苗男女拆敗布緝條以織衣無衿竅而納諸首以青藍布裹頭少年縛楮皮於額婚乃去之婦人斂馬鬣尾雜髮爲髮大如斗籠以梳裳服先用蠟繪花於布後染之既染去蠟則花現飾袖以錦故曰花苗通志黔書每歲孟春合男女於野謂之跳月擇平壤爲月場鮮衣艷粧男吹蘆笙女振響鈴旋躍歌舞謔浪終日暮挈所私而歸比曉乃散聘資視女之妍媸爲盈縮遇喪則屠牛召戚遠近各攜酒肉以賻環哭盡哀塋不用棺斂手足而瘞之卜地以雞子擲之不破者

爲吉病不服藥惟禱於鬼宰牲磔雞往往破家終不
悔悟以六月爲歲其性慙而畏法其俗陋而力勤
白苗衣僅及膝男子科頭赤足婦人盤髻長簪跳月
之習與花苗同祀祖擇大牯牛角端正者飼及茁壯
卽通各寨有牛者合鬪於野勝卽爲吉鬪後卜日砍
牛以祀主祭者服白衣青套細褶寬腰裙祭後合親
族高歌暢飲其性慙而厲轉徙不恆爲人僱役懇田
往往負租逃去

通志

青苗服飾皆尙青男子頂竹笠躡草屨婦人以青
一幅製如九華巾着之性强悍好爭鬪同族

不敢爲盜黠

楊保乃播州之裔其婚姻葬祭頗同漢人亦有挽思
哀悼之禮但性狡而獷間或緣事官司差役拘捉輒
抗拒不出通志

按今遵義各屬極僻所在尙有此種數家皆與人
雇佃淳樸不知犯法而向來土著者至今漸漬禮
教皆與漢人無別俗以其老籍謂之轉窩子然其
人家類忠慤勤儉鮮作姦犯科事與籍他省者機
詐百出迥然不同太樸之遺亦幸存矣

狃家不與諸苗齒自矜曰我狃家也人謂之苗輒拂

之噫唯之與阿相去幾何耶狝家婦女好裝飾以硃
錦爲裳而短省志謂其長裙或別有所見腹上加一
兜青布爲之著草屨簪花爲冶容自趨於市貴陽甚
多仁懷間有之

仁懷志

紅苗衣服悉用斑絲女紅以此爲務牲畜不宰皆梃
殺以火去毛帶血食之人死則將所遺衣服裝像擊
鼓歌舞名曰調鼓五月寅日夫婦各宿不敢言不出
戶以避鬼恐致虎俚同類鬥殺以婦人勸方解通按
雍正間紅苗首禍剿滅幾絕今仁懷多紅苗仁懷志
六額子在大定與仁懷毗連者或時往來

土人在大定者曰獮獮本曰盧鹿深目長身白齒鉤

鼻或曰卽羅鬼仁懷有之

馬鶻苗以布擁腹如馬鶻赤水里有之

並仁懷志

遵義府志卷二十一

祥異

子產曰天道遠人道邇豈不信哉顧降祥降殃概謂無故而然亦非聖賢修省道也遵義自漢至今所傳所聞見多可攷信茲哀而錄之使盡人事以迓天庥者知所感召其不敢強傳會推測猶是夾漈災祥略不紀徵應之意云

漢

高帝元年十月五星聚於東井

史記

景帝二年十二月有星孛於西南

三年春正月長星出西方

並孫志

成帝河平二年十月下旬填星在東井軒轅南端大星尺餘歲星在其西北尺所熒惑在其西北二尺所皆從西方來填星貫輿鬼先到歲星次熒惑亦貫輿鬼十一月上旬歲星熒惑西去填星皆西北逆行占曰三星若合是謂驚位是謂絕行外內有兵與喪改立王公其十一月丁巳夜郎王歆大逆不道牂柯太守立捕殺歆三年三月左將軍千秋卒四年四月梁王賀薨

漢書天文志

哀帝建平四年十二月白氣出西南從地上至天出

參下貫天厠廣如疋布長十許丈十餘日方滅舊蜀志

靈帝熹平三年歲大饑斗粟千錢孫志

晉

武帝咸寧四年夏四月蚩尤旗見於東井晉書

惠帝光熙元年五月枉矢西南流

懷帝永嘉四年十月大星西南墜有聲

穆帝升平四年冬十月天狗流於西南並同上

齊

武帝永明六年熒惑逆行入於太微齊書

陳

文帝天嘉元年九月癸丑彗星見長四丈芒指西南

陳書

周武帝天和三年

當陳光大二年

二月己未太白犯井北軒

轅第一星夏四月太白入輿鬼犯積尸六月甲戌有

星孛於東井至輿鬼乃滅

周天和六年

當陳光大三年

四月己卯熒惑犯輿鬼

周建德元年

當陳光大四年

七月丙午太白合於東井

周建德二年

當陳光大五年

二月壬戌熒惑犯輿鬼入積尸

周建德五年

當陳光大八年

六月庚午熒惑入輿鬼

周宣政元年

當陳光大十年

六月癸丑歲星熒惑太白合於

東井

周宣帝大象元年

當陳大建十一年

四月戊子太白歲星辰

星合於東井

以上北周書

隋

文帝開皇八年二月鎮星入東井

隋書

唐

德宗建中元年六月熒惑太白鬥於東井

宣宗大中二年彗星出於觜參

昭宗天復元年五月丁酉至于巳亥太白晝見經天在井度八月巳亥西方有白雲如履底中出白氣如

正練長五丈上衝天分爲三彗頭下垂以上蜀志

後唐

明宗天成二年十二月壬辰西南方有赤氣如火燄

約三十里蜀志

宋

甲子太祖乾德二年綏陽縣民王義田禾一莖兩穗孫志綏陽

志

太宗雍熙四年有犀自黔南入萬州民捕殺之獲其皮角

仁宗慶厯三年七月戊辰夜西南生黑氣長三丈許

經天而散

徽宗建中靖國元年正月星出西南如盂東北急流
入尾

大觀元年二月星出參如杯西南急流入蜀沒以上舊蜀志

高宗紹興十六年十二月戊戌彗見西南乙巳滅

二十六年秋七月丁未彗出井內丙辰彗滅

孝宗淳熙十年南平旱

十四年十一月甲寅西南方有赤氣隨日入

理宗景定五年秋七月乙卯彗星退於鬼辛巳彗星

退於井

瀛國公德祐二年春正月己卯月暈東井以上宋史本紀

元

世祖至元元年秋七月甲戌彗星出輿鬼

成宗大德五年九月乙酉自八月庚辰彗星出井歷

紫微垣天市垣凡四十六日而滅舊蜀志云八月庚辰彗星出井二十

四度經貫索星長丈餘至天市垣巴蜀之東凡四十日乃滅

仁宗皇慶二年二月丁未彗星出東井

順帝至元五年八番順元等處皆饑以上元史本紀

二十二年播州田鼠食禾幾盡總管祠而祝之鼠悉

赴水死

孫志

明

太祖洪武十一年八月播州蝗大行

孫志

成祖永樂六年八月夜有星大如盞赤白色尾跡有

光出西方西南行入游氣

舊川志

英宗正統九年夏六月苗民饑發粟賑之

黔志

景帝景泰二年夏大饑

黔志

憲宗成化三年播州大旱

孫志

十八年蝗食粟

綏陽志

孝宗弘治元年播州大旱

孫志

八年冬十一月地震

九年夏五月大水

並黔志

世宗嘉靖七年播州大旱

孫志

八月仁懷明甯被稼懷

縣志

八年播州大疫

孫志

十一年秋八月彗星見東井芒長丈餘掃太微垣及

角宿天門凡一百十有五口乃滅

明史

十五年播州地震有聲

二十六年播州大旱

並孫志

三十三年

原無年考馮岳討播饑殺黨在是年當即其年事

天旺落六寨女

酥卽變產牝牡而獸尾眾以爲女與畜交故有此三
度關守耆白之總督馮岳將訊之岳曰蠻族本穴居
巢卧人獸相雜此卽盤瓠馬人之故習也何怪焉遂
敕壞所產而置女不問

蠻司台誌

三十一年十月仁懷大霜凝結如花草

四十年仁懷旱三月不雨

並仁懷志

四十四年秋七月播州大雹雪傷稼

黔志

丙寅四十五年二月大雨雪雹

孫志

戊寅神宗萬曆六年播州大疫

孫志

戊子十六年大旱

綏陽志

十七年春饑大疫秋有年

孫志

二十三年大有年

仁懷志

二十七年正月丙日下復有一小日空中相盪數日方止四月彗尾見于西方其芒如帚又有一星四圍皆若芒刺民間謠云有飯無人吃有路無人行老者死大半幼者死七分六月應龍率苗兵犯順二十日抵至登鋪張良賢戰不利退回與房嘉寵約空綦城以免民難房不然之次日城陷殺男女萬計浮屍滿江城內外焚毀幾盡此建設以來非常之慘也神宗震怒命總督李化龍督師會勦

綦江志

播酋叛勢甚張

十月經歷譚恕避兵深巖忽聞石裂有文在石上云

聚山巖人化血石壁壞諸蠻絕

明詩綜

二十九年斗米千錢

綏陽志

三十二年五月初十日綏陽大水浸城七尺十月十

六日城中復火民居殆盡三日前黑犬上屋行

綏陽志

三十三年四月二十九日綏陽大水城圯東南角至

七月初四日雨始止田禾盡沒

綏陽志

三十四年大有年

黔志云大旱

夏五月綏陽大水冬十

月綏陽火城中民居幾盡

黔志

三十八年府民戴姓家猪產八子內一象形尋斃

四十年春正月郡城火二月雨微疫自正月晦前四
日至二月朔後五日數處火災延燒甚廣民不聊生
又自冬迄春不雨日色常赤郡守孫敏政率屬祈禱
遂獲微霖火患方息

並孫志

四十六年二月地震有聲自西而南

四十七年三月蚩尤旗見於遵義西方經月乃滅

並黔志

志

乙丑熹宗天啟五年大旱

庚辰懷宗崇禎十三年大旱

十五年三月朔青紅暈日闊數百丈黑霧如虹閃爍

盪晃至午方散

並陳志

國朝

順治五年六年連遭荒疫民大饑斗粟四兩僵尸載道

七年九月大水山石崩裂

並陳志

十三年大旱邇遠近傳有抹臉魔中夜面皮忽失去如剝男女夜圍坐不敢寐無故自驚

紫江縣志

按湄潭縣志云癸巳年民間驚告有抹臉賊來晝夜各聚守數月乃罷抹臉者爲剗人頭之半割其面以去也相傳羅鬼之俗渠長歲抹人臉以祀神

不知果否昔年孫王在黔黔中人忽傳王調羅鬼
兵自助降神卜之神曰抹萬人臉爲祭者兵出乃
勝王許之千旦使人四出盜殺而取之實無是事
也所在震動雖官吏亦走匿他所此與綦江志所
紀前三年未知孰確

十四年二月遵義雷火焚民居擊死者三人

陳志

十六年巳亥大旱斗米一金

涪潭縣志

十七年雨潦秋歉

康熙元年大有年

二年正月遵義雷火焚民居

十一年七月流星赤色大如斗自南墜翼軫間有聲如雷

十二年十一月彗星見於西南三角刺目

十三年三月朔郡城火通城盡燼惟道府縣公署僅存燒死男婦三百餘口十五夜城外三黨復火民居無存

十五年大疫

十六年郡城北內外火

十七年遵義大水壞民田四千餘畝各里汙沒無算

十九年彗星拂東井自西至北經旬始沒

以上陳志

二十一年仁桐界蟠龍水大疫死及牛畜鳥獸是年

雨澇秋歉

談亮集

二十三年夏四月大水壞郡城東門外石橋後復大旱饑秋上莊石華庵牡丹開一花四蕊無葉經冬乃

凋

陳志

二十五年大有年

三十七年二月邵城火城內民居半燬

雍正元年大有年

七年慶雲見於黔嘉禾生一莖兩穗至有十五六穗者穗四百粒至七百粒穗長尺有奇大有年

十年大有年

十二年大有年

以上仁懷志

乾隆四年正安三江里雞公嶺下有石長二丈五尺

形如龜風雨中行數十武雷擊斷之

正安志

二十九年春夏水旱蟲食麥

文蘆洲稿

三十年六月十八日夜聞天鳴

遵義紀聞

三十四年自去年八月淫雨至於夏六月七月二十

六日彗星見於東方指西焉數丈至八月十四日滅

自六月旱至八月始雨秋大歉

同上

三十五年三月十九日遵義南鄉大雹

遵義紀聞麥大歉

無收至失種

文廣洲

夏二麥無收斗米一兩四錢自去

年秋居民皆採側耳根夏枯草墊蕨粉以食甚有掘

白塘名觀音粉爲丸飯者秋大熟

鋤經堂集

三十六年七月朔初昏有物自東北來長數丈黑色

如鱗狀眼大如盤光芒四照除由西南去踰刻又一

物來如前狀稍短小化爲青霧而散秋大熟斗米銀

一錢五分

三十七年歲大熟

三十八年五月桐梓入縣治二十日初昏聞

天鳴秋大熟斗米一錢七分

三十九年四月二十日遵義南隅里雨雪

四十年十一月初五日夜大雷雨初六日初七日兩夜竝雷

四十二年郡泊後山遠望之若小羊數萬飛走往來

近視不見

以上遵義紀聞

四十三年前三月二十四日遵義大雹樹皮盡脫夏

大旱竹樹多枯死斗米一兩彗星長數十丈秋大饑

民多掘老鴉蒜苦藕根以食

鋤經堂集

十一月遵義底水

羅姓斑竹林生筍成林黎李開花結實

遵義紀聞

四十四年巳亥大旱米價仍前年

鋤經堂集

四十五年清潭里水落坑山鳴如雷九月中見天忽
開紅綠色十月中二更見天南方有物大如牛漸如
山色紅燭地若晝逾時滅是年大水壞田禾無算

四十六年七月三十日初昏西方有三星鬪

五十一年四月地震

纂江志云五月初六日

五十四年五月大水溺田禾無算

以上蘆洲文稿

五十七年秋大水壞稼遵義永安里壞民宅數十家
淹死居民五六十口又杉松壩山腰有洞忽湧大水
壞民宅二三十家淹死居民二三十口

新採

嘉慶元年丙辰大旱

二年自五月至八月始雨民至食樹皮

並鋤經
掌集

三年三月十五日五色雲見於西方四月十二日日

暈五色三重胡麥大熟

禮義
紀聞

庚申

五年閏四月桐梓傅予貴妻易氏一產三男官給米布

丁卯

十二年五月桐梓苟開泰妻黃氏一產三男官給米布

並檔
冊

十四年七月正安小溪里羅乾溪有山周四里動陷

為潭

正安
志

十六年七月彗星見九月始滅

綦江
志

十七年大旱

二十年四月立夏後大雪壞秧

二十四年大旱七月二十五日寅刻地震

二十五年大旱十二月二十八日大雷雨雪竝下雪

後虹見

辛巳

道光元年十月天雨紅豆似棗仁味甘香多處可帚

以食歲大饑

二年正月初二日雨雪如斷線

五年七月彗星見長約二丈

八年戊子冬至夜大雷雨

十一年辛卯五月二十日桐梓大水自三壩北所
經淹沒死者不能計七月十四日日光藍綠入室
凍青色竟日無精芒二十四五兩日亦如之並新採

十三年五月正安王京妻楊氏一產三男官給米布

九月初八日大風拔婁山關古木蓮樹

十四年三月二十日遵義沙溪里巖孔壩大雹暴風
雨平地水漲沙石成堆塌民房數十間淹斃男婦大
小二十餘口地周十餘里秋麥盡壞並櫛冊

十五年四月十九初昏聞天鳴六月初四日夜見光
兩道自天下頃刻爲一漸收至天爲一星大如月久

乃滅是歲大旱六月二十四日雷震協署旗竿

十六年三月遵義北鄉雨粟如小豆色赤

十七年六月二十四日雷震協署旗竿

十八年戊戌七月彗星見南方八月大風拔桃源洞

口大木壞昭忠祠左序九月仁懷城內夜聞兵馬聲

十餘夕乃已

十九年二月二十二日日出雲暈五色

二十年四月十三日大風折府署右旗竿十四日日

暈六月淫雨遵義縣樂安里山崩壓民屋死者五人

桐梓縣水入城積二十餘日始漸退近城數十里田

禾皆壞八月遵義永安里楊姓有產人首蛇身者十
月十八夜大雷電

並新
採

遵義府志卷二十一